



**Foras na Gaeilge**

**LEABHRÁN EOLAIS**

**Téarmeolaí Cúnta (Sealadach)**

**Foras na Gaeilge**

## EOLAS D'IARRTHÓIRÍ

Is iad Foras na Gaeilge (an ghníomhaireacht teanga) agus Tha Boord o Ulstèr-Scotch (Bord Albainis Uladh) an dá chuid den Fhoras Teanga, an comhlacht teanga Thuaidh/Theas, ceann de na comhlachtaí forfheidhmithe a bunaíodh faoi théarmaí Chomhaontú Bhéal Feirste. Is iad seo a leanas na feidhmeanna reachtúla a sannadh d'Fhoras na Gaeilge:

- An Ghaeilge a chur chun cinn;
- Úsáid na Gaeilge labhartha agus scríofa a éascú agus a spreagadh, sa saol poiblí agus sa saol príobháideach sa Deisceart agus, i gcomhthéacs Chuid III den Chairt Eorpach do Theangacha Réigiúnacha nó Mionlaigh, sa Tuaisceart áit ar bith a bhfuil ráchairt uirthi;
- Comhairle a thabhairt don dá rialtas, do chomhlachtaí poiblí agus do ghrúpaí eile san earnáil phríobháideach agus san earnáil dheonach;
- Tabhairt faoi thionscadail tacaíochta, agus deontais i gcabhair a thabhairt do chomhlachtaí agus do ghrúpaí de réir mar a mheastar gá a bheith leo;
- Tabhairt faoi thaighde, faoi fheachtais leis an nGaeilge a chur chun cinn, agus tabhairt faoi chaidreamh poiblí agus chaidreamh leis na meáin chumarsáide;
- Téarmaíocht agus foclóirí a shaothrú;
- Tacaíocht a thabhairt don Ghaelscolaíocht agus do theagasc na Gaeilge.

Tá 16 bhall ar Bhord Fhoras na Gaeilge, 8 ón Deisceart agus 8 ón Tuaisceart agus, i gcuideachta Bhord Albainis Uladh, is é Bord an Fhorais Teanga Thuaidh/Theas é.

Tá Foras na Gaeilge freagrach don Chomhairle Aireachta Thuaidh/Theas (CATT), agus go háirithe don Aire Turasóireachta, Cultúir, Ealaíon, Gaeltachta, Spóirt agus Meáin agus don Aire Pobal. Tuigeann Foras na Gaeilge, mar chuid den Fhoras Teanga Thuaidh/Theas, go gcaithfidh a chuid cuspóirí agus straitéisí bheith ag cur le polasaí ginearálta an dá rialtas agus cinnteoidh sé, mar sin, go mbeidh cumarsáid éifeachtach ann leis an dá Roinn chuí, Rúnaíocht na Comhairle Aireachta Thuaidh/Theas, an Roinn Airgeadais sa dá dhlínse. Chomh maith leis sin, cinnteoidh Foras na Gaeilge go bhfuil sé ag cur le ceanglais an Mheamraim Airgeadais agus le hiomlán na gceanglas reachtúil cuí eile sa dá dhlínse.

## Láthair

Oifig Foras na Gaeilge, 63-66 Sráid Amiens, Baile Átha Cliath 1, láthair an phoist faoi láthair agus beidh ar an té a cheapfar dualgais an phoist a chomhlíonadh le linn uaireanta oibre ón Luan go dtí an Aoine ón oifig sin. Tá polasaí maidir le hobair chumaisc i bhfeidhm ag Foras na Gaeilge agus tá féidearthachtaí ann cuid den tseachtain oibre a chur i gcrích ó chian faoin bpolasaí sin.

## Sochair

Baineann na téarmaí agus na coinníollacha seo a leanas le post mar Théarmeolaí Cúnta le Foras na Gaeilge agus cuirfear iad sa Tairiscint Cheapacháin:

Tuarastal: Is é an tuarastal don phost seo €37,039 - €69,452\* (*pro rata*).

D'fhéadfaí an ráta tuarastail a choigeartú ó am go chéile ar aon dul le beartas pá an Rialtais.

\*Caithfear an post a thairiscint ag bun an scála

- Tréimhse an Chonartha: Post sealadach chun saoire mháithreachais a chlúdach. Is féidir go mbeidh síneadh ama i gceist leis an tréimhse de réir riachtanas.
- Uaireanta Oibre: Post lánaimseartha atá ann agus caithfear a bheith i láthair 40 uair (i seachtain cúig lá). Ceadáítear uair an chloig don lón;
- Beidh tréimhse phromhaidh bliana i gceist leis an bpost seo;
- Saoire Bhliantúil: 25 lá (*pro rata*);
- Laethanta Saoire Poiblí agus Pribhléide: 11 lá;
- Pá Breoiteachta: Suas le 3 mhí ar phá iomlán agus 3 mhí ar leathphá ach gan níos mó ná 6 mhí de phá breoiteachta i dtréimhse 4 bliana ar bith;
- Pinsean: Mar a cheadóidh an CATT;
- Saoire Mháithreachais/Atharthachta: de réir na dteidlíochtaí atá i bhfeidhm ag an am;
- Saoire Uchtála: de réir na dteidlíochtaí atá i bhfeidhm ag an am;
- Saoire Thuismitheoireachta: de réir na dteidlíochtaí atá i bhfeidhm ag an am;
- Fógra faoi Éirí as Post: 5 seachtaine ar a laghad: 13 seachtaine ar a mhéad;
- Aois Scoir: de réir na dteidlíochtaí a bheidh i bhfeidhm ag an am;
- Scor de thairbhe Sláinte: Mar a cheadóidh na Ranna Urraíochta sa dá dhlinse;
- Cód Iompraíochta: Mar atá faofa ag an CATT.

## **Ginearálta:**

Tá an Téarmeolaí Cúnta faoi cheangal ag:

1. **Na Cumhachtaí Reachtúla, na dualgais agus na hoibleagáidí** mar atá leagtha síos in I.R. Uimh.859 1999 Tuisceart Éireann “North/South Co-Operation (Implementation Bodies) Northern Ireland) Order 1999” agus Airt.1 de “The British-Irish Agreement Act 1999.”
2. **An Meamram Airgeadais** a cheadaigh an Roinn Airgeadais sa dá dhlínse, rud a leagann amach na nósanna imeachta airgeadais agus na socruithe cuntasáíochta don Fhoras Teanga Thuaidh/Theas.

## **An Próiseas Roghnóireachta**

Caithfear gach iarratas a dhéanamh ar an bhfoirm a chuirfidh Foras na Gaeilge ar fáil. Ní ghlacfar le CVanna. Ba chóir d’iarrthóirí cóip PDF/JPG den fhoirm iarratais chomhlánaithe a sheoladh ar ríomhphost roimh 12 meán lae, 6 Aibreán 2023 chuig: [poist@forasnagaeilge.ie](mailto:poist@forasnagaeilge.ie)

Sa chéad chéim den phróiseas roghnóireachta déanfar an t-eolas ar an bhfoirm iarratais a mheas. Le go rachaidh iarrthóirí ar aghaidh go dtí an chéad chéim eile den phróiseas roghnóireachta tabharfar breithiúnas orthu de réir an eolais a thug siad ar an bhfoirm iarratais agus dá réir sin amháin. I Roinn 2 den fhoirm iarratais iarrtar eolas ábhartha, cuí faoin taithí atá ag iarrthóirí sna critéir atá riachtanach agus inmhianaithe; tá cur síos orthu sa cháipéis seo. Caithfidh iarrthóirí mionchuntas soiléir a thabhairt ar shamplaí den taithí seo a fuair siad san obair a rinne siad lena léiriú go bhfuil siad inniúil don phost.

I dtús báire, bainfear úsáid as na critéir riachtanacha le gearrliosta a dhéanamh d’iarrthóirí a rachaidh ar aghaidh go dtí an chéad chéim eile den phróiseas roghnóireachta.

## **SONRAÍ AN PHOIST**

**Teideal an Phoist:** Téarmeolaí Cúnta (Sealadach)

**Freagrach do:** Príomhthéarmeolaí

**Próifíl an Phoist:** Seirbhís chuimsitheach téarmaíochta a sholáthar.

### **Príomhchúraimí**

#### **Cúraimí Straitéiseacha**

- I gcomhar leis an Phríomhthéarmeolaí pleananna a fhorbairt le freastal ar riachtanais théarmaíochta an phobail agus na hearnála poiblí.
- Páirt ghníomhach a ghlacadh in ullmhú pleananna le haghaidh scaipeadh éifeachtach na téarmaíochta agus úsáid an Bhunachair Náisiúnta Téarmaíochta.

#### **Cúraimí Oibríochtúla**

- Taighde téarmaíochta a dhéanamh maidir le fiosruithe ón phobal, ón earnáil poiblí srl;
- Taighde a dhéanamh ar na liostaí téarmaí do na cruinnithe Coiste agus Fochoistí;
- Cruinnithe Coiste agus Fochoistí a eagrú, liostaí téarmaí a ullmhú agus a dháileadh ar na baill chúí;
- Leasuithe agus moltaí an Choiste agus na bhFochoistí a chlárú;
- Liostaí aicmithe a ullmhú agus a chur in eagar mar chuidiú le feidhmiú forálacha reachtúla;
- Eagarthóireacht ar liostaí a bhaineann le tionscadail éagsúla agus le hobair na bhFochoistí;
- Cinntiú go gcoimeádfar an Bunachar Náisiúnta Téarmaíochta cothrom le dáta maidir le liostaí an Choiste agus na bhFochoistí;
- Faoi stiúir an Phríomhthéarmeolaí plé le pé comhfhreagras / cumarsáid a d'eascródh ón mBunachar Náisiúnta Téarmaíochta.

#### **Cúraimí Airgeadais**

- Faoi stiúir an Phríomhthéarmeolaí a chinntiú go bhfeidhmíonn an Coiste Téarmaíochta taobh istigh den bhuiséad faofa.

#### **Cúraimí Pearsanra**

- Tuairisciú don Phríomhthéarmeolaí ar chur i gcrích aidhmeanna foirne.

### Cúraimí Cumarsáide

- Comhairle a chur ar an phobal, earnáil phoiblí srl faoi chúrsaí téarmaíochta;
- Comhairle teanga a chur ar an phobal maidir le húsáid na téarmaíochta de réir mar is gá;
- Freastal ar chruinnithe foirne go rialta;
- Freastal ar chruinnithe le páirtithe leasmhara de réir mar is gá.

### Eolas Eile

Tá sé mar aidhm ag an gCoiste Téarmaíochta téarmaíocht údarásach chaighdeánach Ghaeilge a fhorbairt, a fhaomhadh agus a chur ar fáil chun tacú leis an nGaeilge mar mheán cumarsáide i sochaí nua-aoiseach.

Tionóltar cruinnithe míosúla den Choiste Téarmaíochta, coiste deonach ar a bhfuil breis is 20 ball a cheaptar ar feadh tréimhse trí bliana. Socraíonn an Coiste Téarmaíochta prionsabail téarmaíochta, déanann siad an obair a phleanáil agus a mhaoirsiú, ceapann siad téarmaí, déileálann siad le fiosruithe ilghnéitheacha ón bpobal agus le ceisteanna aistriúcháin ó oifigí Gaeilge an AE, agus bunaíonn siad fochoistí saineolaithe de réir mar is gá.

## Sonraíocht faoin phearsa

### Critéir Riachtanacha

- Bunchéim onóracha sa Ghaeilge, nó a hiontamhail, ó institiúid oideachais aitheanta tríú leibhéal.
- Ardchaighdeán Gaeilge, idir scríofa agus labhartha, lena n-áirítear ardtuiscint agus mioneolas ar ghramadach na Nua-Ghaeilge agus ar an gCaighdeán Oifigiúil.
- Taithí ag plé le gramadach na Gaeilge agus leis an gCaighdeán Oifigiúil.
- Tuiscint ar thábhacht na téarmeolaíochta.
- Taithí ar chaidreamh éifeachtach a dhéanamh le daoine.
- Scileanna maithe ríomhaireachta agus teicneolaíocht faisnéise.

### Critéir Inmhianaithe

- Taithí eagarthóireachta.
- Taithí aistriúcháin agus/nó foclóireachta.